


BOSNA I HERCEGOVINA
FEDERACIJA BOSNE I HERCEGOVINE
UNSKO-SANSKI KANTON
VLADA UNSKO-SANSKOG KANTONA



BOSNIA AND HERZEGOVINA
FEDERATION OF BOSNIA AND HERZEGOVINA
THE UNA-SANA CANTON
UNA-SANA CANTON GOVERNMENT

Broj: 03-017-958/2017
Dana, 18.05.2017. godine

BOSNA I HERCEGOVINA
FEDERACIJA BOSNE I HERCEGOVINE
UNSKO-SANSKI KANTON
SKUPŠTINA UNSKO-SANSKOG KANTONA

18.05.2017
017-958-4-10-109/17

SKUPŠTINA UNSKO-SANSKOG KANTONA


PREDMET: Nacrt Zakona o oružju i municiji Unsko-sanskog kantona, d o s t a v l j a s e;-

Na osnovu člana 112. i 113. Poslovnika Skupštine Unsko-sanskog kantona („Službeni glasnik Unsko-sanskog kantona“, broj: 9/17), u prilogu vam dostavljamo Nacrt Zakona o oružju i municiji Unsko-sanskog kantona, uz sljedeće:

Obrazloženje

Vlada Unsko-sanskog kantona je na sjednici održanoj dana, 18.05.2017. godine, razmatrala i utvrdila Nacrt Zakona o oružju i municiji Unsko-sanskog kantona, obrađivača Ministarstva unutrašnjih poslova Unsko-sanskog kantona, te vam isti dostavljamo u dalju proceduru.

PRILOG: - Nacrt Zakona (6x)


PREMIJER KANTONA
mr.sc. Husein Rošić
H. Rošić

(NACRT)

ZAKON O ORUŽJU I MUNICIJI

U Bihaću, juna 2017.godine

Na osnovu člana 1. poglavlje IV i člana 11 b) odjeljak A poglavlje V Ustava Unsko – sanskog kantona - prečišćeni tekst ("Službeni glasnik Unsko- sanskog kantona", broj:1/4 i 11/04) i člana 93. Poslovnika Skupštine Unsko-sanskog kantona („Službeni glasnik Unsko-sanskog kantona“ broj: 9/17), Skupština Unsko sanskog kantona na ____ . sjednici održanoj dana _____, donijela je:

ZAKON O ORUŽJU I MUNICIJI UNSKO- SANSKOG KANTONA

DIO PRVI- OSNOVNE ODREDBE

Član 1.

(Predmet zakona)

Ovim zakonom se uređuju kategorije oružja, uslovi za nabavljanje, držanje, nošenje, sakupljanje, popravljavanje, prepravljavanje i trajno onesposobljavanje oružja, oduzimanje oružja i municije, promet i posredovanje u prodaji oružja i municije, način postupanja sa oružjem i municijom, osnivanje i vođenje civilnog strelišta, uzimanje mehaničkog traga oružja i evidencije o oružju i municiji na teritoriji Unsko- sanskog kantona.

Član 2.

(Definicije)

Pojedini pojmovi upotrijebljeni u ovom zakonu imaju slijedeća značenja:

- a) „oružje“ je naprava izrađena ili prilagođena da pod pritiskom vazduha, barutni i drugih gasova ili drugog potisnog sredstva može izbaciti zrno, kuglu, sačmu ili neki drugi projektil, odnosno raspršiti gas ili tečnost te druge naprave koje su namijenjene za samoodbranu, lov ili sport i bitni dijelovi oružja;
- b) „bitni dijelovi oružja“ su: cijevi sa ležištem metka, ulošci-adapteri za vatreno oružje sa olučenim i neolučenim cijevima, zatvarači, navlake, bubanj kod revolvera i rukohvati sa mehanizmom za okidanje, koji su označeni tvorničkim ili serijskim brojem;
- c) „municija za vatreno oružje“ je cjeloviti metak koji sjedinjuje čahuru, kapislu, barutno punjenje i zrno ili sačmu;
- d) „vatreno oružje“ su sve vrste pušaka, pištolja i revolvera, kao i sve vrste naprava koje pod pritiskom barutnih gasova izbacuju kroz cijev zrno, kuglu, sačmu ili druge projektele;
- e) „vazdušno oružje“ su sve vrste pušaka, pištolja, revolvera i druge naprave koje pod pritiskom vazduha izbacuju kroz cijev zrno, dijabolu, kuglicu ili druge projektele;
- f) „gasno/plinsko oružje“ su puške, pištolji i revolveri i druge naprave koje pod pritiskom barutnih gasova ili sabijenog gasa/plina raspršuju nadražljive tvari;
- g) „oružje za signalizaciju“ su pištolji, revolveri, puške i druge naprave koje pod pritiskom energije barutnog punjenja ispaljuju naboj namijenjen isključivo za izazivanje glasnog pucnja ili ispaljivanju svijetleće signalne zvjezdice;
- h) „hladno oružje“ su bodeži, kame, mačevi, sablje, bajoneti i skakavci čije se sječivo nalazi pod pritiskom sabijene opruge, a iz drške iskače pritiskom na dugme ili polugu ili metalne zvjezdice za bacanje, bez obzira na dužinu oštrice, bokseri, buzdovani, te drugo oružje sa skrivenom oštricom kao i drugi predmeti pogodni za nanošenje povreda, kada se nose na

javnim mjestima;

- i) „oružje s tetivom" su lukovi, samostreli i druge naprave koje snagom napete tetive ili druge elastične materije potiskuju strijelu ili drugi projektil;
- j) „lovačko oružje" je vatreno oružje kategorije B sa kojim se smije loviti divljač u skladu sa propisima o lovstvu;
- k) „kombinovano oružje" je oružje sa dvije ili više olučenih (užlijebljenih) i neolučenih (glatkih) cijevi različitog kalibra;
- l) „sportsko oružje" je vatreno oružje kategorije B, vazdušno oružje i oružje sa tetivom koje se koristi za sportske discipline u skladu sa posebnim propisima;
- m) „trofejno oružje" je vatreno, vazdušno i hladno oružje koje se čuva kao uspomena ranijeg perioda istorije Bosne i Hercegovine ili za njegovog vlasnika predstavlja ličnu ili porodičnu uspomenu, a koje je od strane ovlaštene organizacije ili ovlaštenog pojedinca trajno onesposobljeno za upotrebu;
- n) „staro oružje" je hladno i vatreno oružje koje ima istorijsku vrijednost, oružje koje čini sastavni dio narodne nošnje, kao i vojno i policijsko oružje koje je dotrajalo i neupotrebljivo, oružje koje je sastavni dio vojnih i policijskih paradnih odora, oružje koje se puni s usta cijevi crnim barutom a pali s kremenom, fitiljem ili kapislom i koje je od strane ovlaštene organizacije ili ovlaštenog pojedinca trajno onesposobljeno za upotrebu;
- o) „automatsko oružje" je oružje kod kojeg je jednokratnim pritiskom na obarač moguće ispaliti više metaka;
- p) „poluautomatsko oružje" je oružje koje je nakon ispaljivanja svakog metka ponovno spremno za ispaljivanje i kod kojeg je iz cijevi jednokratnim pritiskom obarača moguće ispaljivati jedan metak;
- r) „oružje s repetirajućim mehanizmom" je oružje kod kojeg je nakon ispaljivanja svakog metka potrebno ručno pomoću mehanizma ubaciti metak u cijev;
- s) „oružje za jedinačnu paljbu" je oružje bez spremnika-magacina koje se svaki put prije ispaljivanja metka puni ručno ubacivanjem metka u ležište cijevi ili ležište punjenja koje se nalazi na kraju cijevi;
- t) „vatreno oružje kratke cijevi" je oružje čija cijev nije duža od 30 cm, a ukupna dužina ne prelazi 60 cm, osim ako posebnim zakonom nije drugačije propisano;
- u) „vatreno oružje duge cijevi" označava oružje čija dužina cijevi prelazi 30 cm, odnosno oružje čija ukupna dužina sa cijevi prelazi 60 cm;
- v) „oružje za ličnu bezbjednost" čine pištolji i revolveri iz člana 2. stav (1) tačka (d) ovog zakona, kalibra 4,8 mm i veći;
- z) „električni paralizatori" su ručne naprave koje pomoću visokog električnog napona privremeno onesposobljavaju osobu;
- aa) „sprej za omamljivanje" je naprava kojom se usmjereno izbacuju u vidu mlaza ili pjene neškodljive nadražljive tvari za onesposobljavanje pojedinca i koje na ljudsko zdravlje imaju kratkotrajan učinak;
- bb) „optički nišan" je naprava kojom se oružju povećava preciznost;
- cc) „minsko- eksplozivna sredstva" su sve vrste bombi, mina, granata i drugih naprava opremljenih s eksplozivnom materijom ili detonatorom, (težina, udar, potez, trenje, hemijska reakcija, električna energija i sl.) kod kojih dolazi do oslobađanja energije i njihovog rasprskavanja;
- dd) „lažna municija" je municija bez oštrog ili ubojitog naboja kojom se postiže efekat pucnja;
- ee) „municija sa prodirućim zrnima" je municija namijenjena za vojnu upotrebu kod koje se zrno nalazi u čahuri i ima prodiruće tvrdo jezgro;
- ff) „municija sa eksplozivnim zrnima" je municija za vojnu upotrebu kod koje zrno sadrži punjenje koje eksplodira pri udaru;
- gg) „municija sa zapaljivim zrnima" je municija za vojnu upotrebu kod koje zrno sadrži hemijsku smjesu koja se zapali pri kontaktu s vazduhom ili na udar;

- hh) „mužari-prangije“ su ručne ili samostojeće naprave namijenjene za izazivanje glasnog pucnja, koje su konstruisane tako da ne mogu primiti cjeloviti naboj, pune se s usta cijevi određenom količinom crnog baruta i pale štapinom, kremenom i kapislom, a zatvaraju sredstvom male specifične težine;
- ii) „reprodukcije oružja“ su kopije dugog i kratkog vatrenog oružja, koje se pune s usta cijevi crnim barutom i pale fitiljem, kremenom ili kapislom;
- jj) „posebna oprema za vatreno oružje“ je svaki mehanizam namijenjen kao dodatak za osnovni model oružja, čijom primjenom se mijenjaju mogućnosti kod upotrebe oružja, osim optičkog nišana.
- kk) „imitacija oružja“ su predmeti koji su vanjskim izgledom slični ili jednaki oružju, ali ih nije moguće upotrijebiti niti prepraviti u vatreno oružje;
- ll) „dekorativno oružje“ je oružje koje je izrađeno u dekorativne svrhe i nije ga moguće upotrijebiti ili prepraviti u vatreno oružje;
- mm) „civilno streljiste“ je objekat namijenjen sportsko- rekreativnom gađanju i praktičnoj obuci za upotrebu i rukovanje vatrenim oružjem, koji ispunjava tehničke i sigurnosne uslove za upotrebu registrovanog ili prijavljenog oružja;
- nn) „onesposobljavanje vatrenog oružja“ je onesposobljavanje svih bitnih dijelova oružja na način da njihovim uklanjanjem, zamjenom ili izmjenom ne može biti omogućeno njegovo osposobljavanje;
- oo) „popravljanje oružja“ je otklanjanje kvarova na oružju i zamjena ili ugradnja originalnih dijelova;
- pp) „prepravljanje oružja“ je prilagođavanje oružja drugoj municiji, zamjena ili ugradnja bitnih dijelova oružja i drugi zahvati na oružju kojima se utiče na njegovo funkcionisanje ili na tehnička svojstva;
- rr) „prenošenje oružja“ je premiještanje oružja, za koje je izdat oružni list, sa jednog mjesta na drugo;
- ss) „promet oružja i municije“ je nabavljanje oružja i municije radi prodaje, smještaj i čuvanje oružja i municije u svrhu prodaje, prodaja oružja i municije na malo i veliko;
- tt) posrednik u prometu oružjem- broker, u smislu ovog zakona, je pravno ili fizičko lice registrovano za obavljanje djelatnosti, koje se na osnovu odobrenja nadležnog organa bavi pregovaranjem, ugovaranjem i posredovanjem u ugovaranju poslova u vezi sa kupovinom ili prodajom oružja i municije, a koji se ne bavi prometom oružja i municije;
- uu) „registracija oružja“ je unos podataka o oružju i vlasniku, odnosno korisniku oružja u službene evidencije propisane ovim zakonom, kao i propisima donijetim na osnovu ovog zakona, uz izdavanje odgovarajuće isprave;
- vv) „registrovano oružje“ je oružje za koje je izdata odgovarajuća isprava o oružju;
- zz) „vlasnik oružja“ je fizičko ili pravno lice kome je izdata odgovarajuća isprava o oružju;
- aaa) „ovlašteni trgovac oružjem“ je pravno lice ili fizičko lice registrirano za obavljanje djelatnosti koji posjeduje odobrenje nadležnog organa za bavljenje prometom oružja i municije;
- bbb) „držanje oružja“ podrazumijeva posjedovanje oružja na osnovu oružnog lista ili odobrenja za držanje oružja;
- ccc) „nošenje oružja“ podrazumijeva da lice nosi pištolj, odnosno revolver na osnovu izdate dozvole za nošenje oružja;
- ddd) „oružni list“ je isprava o oružju na osnovu koje se drži, odnosno drži i nosi oružje u skladu sa ovim zakonom i sadrži podatke o oružju, bitnim dijelovima oružja i vlasniku oružja;
- eee) „dozvola za nošenje oružja“ je isprava na osnovu koje lice ima pravo da nosi pištolj, odnosno revolver registrovan kao oružje za ličnu bezbjednost iz kategorije B;
- fff) „odobrenje za sakupljanje i držanje starog oružja“ je isprava o oružju koja omogućava

- fizičkom i pravnom licu sakupljanje i držanje starog oružja bez prava nošenja;
- ggg) „odobrenje za držanje trofejnog oružja“ je isprava o oružju koja omogućava fizičkom i pravnom licu sakupljanje i držanje trofejnog oružja bez prava nošenja;
- hhh) „potvrda o prijavi oružja“ je isprava koju izdaje nadležni organ prilikom prijave oružja kategorije C;
- iii) „odobrenje za nabavku oružja“ izdaje nadležni organ fizičkim i pravnim licima ukoliko ispunjavaju uvjete iz člana 9., odnosno člana 16. ovog zakona;
- jjj) „odobrenje za držanje oružja“ je isprava o oružju koja se izdaje pravnom i fizičkom licu koje je registrovano za obavljanje djelatnosti u svrhu držanja oružja;
- kkk) „potvrda za nošenje oružja i municije“ je isprava koju pravno ili fizičko lice registrirano za obavljanje djelatnosti izdaje fizičkom licu u svrhu posluge oružjem i municijom;

Član 3. (Primjena)

- (1) Fizička i pravna lica mogu nabavljati, držati i nositi oružje i municiju samo po odredbama ovog zakona.
- (2) Odredbe ovog zakona u pogledu nabavljanja i držanja i nošenja oružja i municije primjenjuju se i na strane državljane sa stalnim boravkom ili privremenim boravkom dužim od 1 godine.
- (3) Odredbe ovog zakona u pogledu nošenja oružja i municije primjenjuju se i na strane državljane koji prenose oružje i municiju preko državne granice Bosne i Hercegovine u skladu sa odredbama Zakona o graničnoj kontroli („Službeni glasnik Bosne i Hercegovine“, broj:53/09, 54/10 i 47/14).
- (4) Odredbe ovog zakona ne odnose se na pripadnike agencija, organa i institucija u Bosni i Hercegovini, koji nabavljaju i nose oružje i municiju u skladu sa svojim propisima.
- (5) Lica sa područja drugog entiteta, kantona ili Brčko distrikta Bosne i Hercegovine imaju pravo nošenja oružja na području Unsko- sanskog kantona uz odgovarajuću dozvolu za nošenje nadležnog organa.

Član 4. (Izuzeci od primjene Zakona)

U smislu ovog zakona ne smatra se oružjem :

- a) dekorativno oružje;
- b) imitacije oružja;
- c) oružje koje je trajno onesposobljeno za upotrebu tehničkim postupcima koji su određeni posebnim propisima;
- d) oružje koje je namijenjeno za alarmiranje, signalizaciju, spašavanje života i usmrćivanje životinja;
- e) oružje koje se koristi u industrijske ili tehničke svrhe pod uslovom da može biti korišteno samo za to navedene svrhe;
- f) municija za vazdušno oružje;
- g) municija za oružje s tetivom i lažna municija.

Član 5. (Primjena Zakona o upravnom postupku Federacije Bosne i Hercegovine)

Na sva pitanja postupka koja nisu uređena ovim zakonom primjenjuju se odredbe Zakona o upravnom postupku Federacije Bosne i Hercegovine.

DIO DRUGI- ORUŽJE I MUNICIJA

POGLAVLJE I - KATEGORIZACIJA ORUŽJA

Član 6.

(Kategorizacija oružja)

Oružje se, prema ovom zakonu razvrstava u četiri kategorije:

a) kategorija A, koju čine:

- 1) vojni projektili s eksplozivnim punjenjem, lanseri i bacači;
- 2) automatsko vatreno oružje;
- 3) vatreno oružje koje je kamuflirano tako da izgleda kao neki drugi predmet,
- 4) municija s probojnim, eksplozivnim, obilježavajućim ili zapaljivim projektilima, te projektili za takvu municiju;
- 5) municija za pištolje i revolvare s projektilom koji ima ekspanzijski učinak i projektili za takvu municiju osim municije za lov ili sportsko streljaštvo za lica kojima je dozvoljeno da koriste to oružje,
- 6) minsko-eksplozivna sredstva i dijelovi;
- 7) oružje koje je izrađeno ili prerađeno bez odobrenja za promet oružjem, osim oružja iz kategorije C podtačka 3);
- 8) poluautomatsko vatreno oružje za civilnu upotrebu, koje po svom autentičnom izgledu odgovara automatskom oružju,
- 9) ostalo vatreno oružje koje nije obuhvaćeno kategorijama B,C ili D;
- 10) posebna oprema za vatreno oružje.

b) kategorija B, koju čine:

- 1) poluautomatsko ili repetirajuće vatreno oružje kratke cijevi;
- 2) vatreno oružje kratke cijevi za jedinačnu paljbu sa središnjim paljenjem;
- 3) vatreno oružje kratke cijevi za jedinačnu paljbu s rubnim paljenjem;
- 4) lovačko oružje u skladu sa propisima o lovstvu Federacije Bosne i Hercegovine;
- 5) poluautomatsko vatreno oružje duge cijevi sa magacinom i ležištem za najviše tri metka, kod kojeg se magacin, odnosno opruga za punjenje može skinuti, odnosno nije sigurno da li je oružje napravljeno tako da se uz obični alat može prepraviti u oružje sa magacinom i ležištem za više od tri metka;
- 6) repetirajuće i poluautomatsko vatreno oružje duge cijevi s glatkom cijevi ukupne dužine do 60 cm;
- 7) repetirajuće vatreno oružje duge cijevi koje nije obuhvaćeno u podtački 6) ove tačke;
- 8) vatreno oružje duge cijevi za jedinačnu paljbu sa jednom ili više užlijebljenih cijevi;
- 9) vatreno oružje duge cijevi za jedinačnu paljbu sa jednom ili više glatkih cijevi;
- 10) poluautomatsko vatreno oružje duge cijevi koje nije obuhvaćeno podtačkama od 4), 5), 6) i 7) ove kategorije;
- 11) staro i trofejno oružje.

c) kategorija C, koju čine:

- 1) gasno oružje;
- 2) reprodukcija vatrene oružja kod kojeg se ne upotrebljava jedinstveni naboj;
- 3) mužari;
- 4) vazdušno oružje;

5) električni paralizatori;

d) kategorija D, koju čine:

- 1) raspršivači, odnosno sprejevi;
- 2) oružje s tetivom, osim podvodnih pušaka i drugih predmeta, koji snagom opruge, napete gume ili sabijenog plina izbacuju osti ili harpun i koji su isključivo namjenjeni ribolovu;
- 3) hladno oružje.

Član 7.

(Ograničenja posjedovanja oružja)

- (1) Zabranjeno je nabavljanje, držanje ili nošenje i promet oružja kategorije A, nabavljanje, držanje i promet hladnog oružja kojem je osnovna namjena napad ili nanošenje ozljeda, nošenje takvog hladnog oružja na javnom mjestu i nabavljanje, držanje i promet podvodnih pušaka i drugih predmeta, koji snagom opruge, napete gume ili sabijenog plina izbacuju osti ili harpun i koji su isključivo namjenjeni ribolovu.
- (2) Zabranjeno je nabavljanje, držanje ili nošenje oružja kategorije B bez odgovarajuće isprave o oružju.
- (3) Oružje kategorije C nabavlja se u slobodnoj prodaji, a drži se i nosi na osnovu izdate prijave o oružju nadležnog organa.
- (4) Oružje kategorije D nabavlja se u slobodnoj prodaji, a držanje i nošenje se ne prijavljuje nadležnom organu.
- (5) Oružje kategorije C i D mogu nabavljati, držati ili nositi samo lica starija od 18 godina.

POGLAVLJE II - NABAVLJANJE ORUŽJA I MUNICIJE I ISPRAVE O ORUŽJU

Član 8.

(Zahtjevi i obrasci isprava o oružju)

- (1) Zahtjev za izdavanje odobrenja za nabavku oružja podnosi se na propisanom obrascu nadležnom organu prema mjestu prebivališta, odnosno sjedišta podnosioca zahtjeva.
- (2) Obrazac zahtjeva iz stava (1) ovog člana, kao i svih drugih zahtjeva vezanih za izdavanje isprava o oružju, te izgled i sadržaj obrazaca isprava o oružju utvrdiće se pravilnikom kojeg donosi ministar unutrašnjih poslova na prijedlog policijskog komesara.

Član 9.

(Uvjeti za izdavanje odobrenja za nabavku oružja fizičkom licu)

- (1) Nadležni organ izdaje fizičkom licu odobrenje za nabavku oružja ukoliko ispunjava opće i posebne uvjete.
- (2) Opći uvjeti za izdavanje odobrenja za nabavku oružja fizičkom licu su:
 - a) da je državljanin Bosne i Hercegovine ili stranac sa stalnim boravkom ili privremenim boravkom dužim od 1 godine;
 - b) da je navršio 21 godinu života;
 - c) da ima opravdani razlog za nabavku oružja;

- d) da nije osuđivan za krivično djelo ili da se protiv lica ne vodi krivični postupak, osim za krivična djela protiv bezbjednosti javnog saobraćaja;
 - e) da nije kažnjavan za prekršaj protiv javnog reda i mira sa elementima nasilja, prekršaj propisan Zakonom o oružju i municiji za koji je propisana zaštitna mjera oduzimanja oružja ili za prekršaj sa elementima nasilja u skladu sa drugim zakonom, kao i da se protiv tog lica ne vodi postupak za takve prekršaje;
 - f) da ne postoje okolnosti koje negativno utiču na javni red i mir, odnosno interese bezbjednosti, kao i da ne postoje druge okolnosti koje ukazuju da bi oružje moglo biti zloupotrijebljeno, kao što je: prekomjerno uživanje alkohola, konzumacija opojnih droga ili drugih omamljujućih sredstava, izraženo poremećeni porodični odnosi, sukobi s okolinom, agresivno i ekscesno ponašanje i drugi poremećaji u ponašanju, kriminalističko- obavještajni razlozi i razlozi koji ukazuju na povezanost sa osobama iz kriminalističko- obavještajne evidencije i slično.
- (3) Posebni uvjeti za izdavanje odobrenja za nabavku oružja fizičkom licu su:
- a) da je zdravstveno sposoban za držanje i nošenje oružja;
 - b) da raspolaže tehničkim znanjem i vještinom za pravilnu upotrebu oružja i da poznaje propise koji se odnose na držanje i nošenje oružja;
 - c) da ima uvjete za siguran smještaj i čuvanje oružja.
- (4) Izuzetno od stava (2) tačka b) ovog člana, odobrenje za nabavku oružja može se izdati i licu iz člana 3. stava (4) ovog zakona, sa navršениh 18 godina života za vrijeme aktivne službe i članovima sportskih streljačkih udruženja koji se aktivno takmiče u streljaštvu.
- (5) Nadležni organ formira komisiju za odlučivanje po podnesenom zahtjevu za nabavku, držanje i nošenje oružja i municije, koja ocjenjuje opravdanost zahtjeva za nabavku, držanje i nošenje oružja i municije.
- (6) Uvjeti za bezbjedan smještaj oružja i municije iz stava (3) tačka c) ovog člana utvrđuju se pravilnikom, koji donosi ministar unutrašnjih poslova na prijedlog policijskog komesara.

Član 10.

(Utvrđivanje uvjeta za izdavanje odobrenja za nabavku oružja fizičkom licu)

- (1) Uvjet iz člana 9. stav (2) tačka a) i b) podnosilac zahtjeva dokazuje dostavljanjem fotokopije lične karte;
- (2) Uvjet iz člana 9. stav (2) tačka c), odnosno da fizičko lice ima opravdan razlog za nabavku oružja, se dokazuje:
 - a) izvršenim provjerama nadležnog organa da je njegova lična bezbjednost ugrožena ili bi mogla biti ugrožena u tolikoj mjeri da mu za njegovo obezbjeđenje treba oružje ili ukoliko zbog naravi posla ili okolnosti u kojim ga obavlja postoji potreba za nabavkom oružja;
 - b) članstvom u lovačkom društvu i položenim lovačkim ispitom, što podnosilac zahtjeva dokazuje uvjerenjem o članstvu u lovačkom društvu i uvjerenjem o položenom lovačkom ispitu.
 - c) članstvom u sportskoj streljačkoj organizaciji, što podnosilac zahtjeva dokazuje uvjerenjem sportske streljačke organizacije čiji je član.
- (3) Uvjet iz člana 9. stav (2) tačke d) ovog zakona, odnosno da se protiv istog ne vodi krivični postupak, dokazuje se na osnovu uvjerenja nadležnog suda koji dostavlja podnosilac zahtjeva, a činjenicu o neosuđivanosti utvrđuje nadležni organ za vođenje kaznenih evidencija.

- (4) Uvjet iz člana 9. stav (2) tačka e) ovoga zakona utvrđuje se provjerom u prekršajnoj evidenciji u nadležnom policijskom organu.
- (5) Uvjet iz člana 9. stav (2) tačka f) ovog zakona utvrđuje se provjerom nadležnog organa na terenu.
- (6) Radi utvrđivanja uvjeta iz člana 9. stav (2) tačka c) i f) i stava (3) tačka c) ovoga zakona, nadležni policijski službenik ovlašten je da traži i prikuplja podatke i informacije od građana o podnosiocu zahtjeva za nabavku oružja.
- (7) Lovačke i streljačke organizacije su u obavezi da u roku od osam dana dostave nadležnom organu obavijest o prestanku članstva svoga člana.

Član 11.

(Dostavljanje dokaza o ispunjavanju posebnih uslova)

- (1) Nadležni organ dostavlja pismeno obavještenje podnosiocu zahtjeva koji ispunjava opće uvjete iz člana 9. stav (2) ovog zakona, da u roku od 60 dana dostavi dokaze o ispunjavanju posebnih uvjeta iz člana 9. stav (3) tačka a) i b) ovog zakona.
- (2) U roku iz stava (1) ovog člana nadležni policijski službenik ovlašten je da neposrednim opažanjem u stambenom ili drugom prostoru, gdje se oružje drži, utvrdi postojanje uvjeta iz člana 9. stav (3) tačka c), da je osiguran bezbjedan smještaj i čuvanje oružja, u skladu sa pravilnikom iz člana 9. stav (6).

Član 12.

(Dokazi o zdravstvenoj sposobnosti za držanje i nošenje oružja)

- (1) Uvjet iz člana 9. stav (3) tačka a) ovoga zakona podnosilac zahtjeva dokazuje uvjerenjem o zdravstvenoj sposobnosti za držanje i nošenje oružja, a lice iz člana 3. stav (4) ovog zakona potvrdom nadležnog organa o zaposlenju.
- (2) Uvjerenje i potvrda iz stava (1) ovog člana ne mogu biti stariji od šest mjeseci od dana izdavanja.
- (3) Uvjerenje iz stava (1) ovog člana izdaje nadležna zdravstvena ustanova.
- (4) Nadležni organ za zdravstvo imenovanju zdravstvenu ustanovu i komisiju za utvrđivanje zdravstvene sposobnosti za držanje ili držanje i nošenje oružja.
- (5) Bliži uvjeti koje moraju ispunjavati zdravstvene ustanove koje će obavljati zdravstvene preglede kojima se utvrđuje zdravstvena sposobnost za držanje i nošenje oružja, način i postupak obavljanja zdravstvenih pregleda, popis bolesti i zdravstvenih stanja koja lice čine nepodobnim za držanje i nošenje oružja, način vođenja evidencije i medicinske dokumentacije i sadržaj uvjerenja o izvršenom zdravstvenom pregledu, kao i naknade u vezi s utvrđivanjem zdravstvene sposobnosti utvrdiće se pravilnikom, koji donosi ministar unutrašnjih poslova u saradnji sa Ministarstvom zdravstva i socijalne politike.

Član 13.

(Promjene zdravstvene sposobnosti)

- (1) Nadležna zdravstvena ustanova, odnosno ljekar koji ima saznanja o promjeni zdravstvenog stanja vlasnika oružja, a koja može uticati na njegovu sposobnost za držanje i nošenje oružja, dužna je odmah po saznanju za takvu promjenu obavijestiti nadležni organ koji vodi evidenciju o oružju.
- (2) Nadležni organ koji vodi evidenciju o oružju dužan je jednom godišnje obavijestiti

nadležnu zdravstvenu ustanovu o vlasnicima oružja.

Član 14.

(Dokazi o tehničkom znanju i vještini za pravilnu upotrebu oružja)

- (1) Ispunjavanje uvjeta iz člana 9. stav (3) tačka b) ovog zakona za oružje kategorije B podnosilac zahtjeva dokazuje potvrdom o položenom ispitu o osposobljenosti za pravilno držanje, nošenje i rukovanje oružjem.
- (2) Izuzetno od stava (1) ovog člana, lice iz člana 3. stav (4) ovog zakona, za vrijeme aktivne službe ili nakon odlaska u penziju, uslove dokazuje ispravom o zaposlenju, odnosno o prestanku radnog odnosa zbog ispunjavanja uvjeta za penziju.
- (3) Stručna ovlaštena organizacija za obuku u rukovanju vatrenim oružjem može biti streljačka, odnosno druga organizacija i ustanova koja raspolaže potrebnim prostorom, strelištem, stručnim kadrom i koja ispunjava propisane uslove za sprovođenje obuke i posjeduje odobrenje nadležnog organa koji izdaje isprave o oružju.
- (4) Potvrdu iz stava (1) ovog člana izdaje Komisija za provjeru znanja o pravilnom držanju, nošenju i rukovanju oružjem koju imenuje nadležni organ.
- (5) Program obuke i načinu osposobljavanja za pravilno rukovanje, držanje i nošenje oružja utvrdiće se pravilnikom, koji donosi ministar unutrašnjih poslova na prijedlog policijskog komesara .

Član 15.

(Rješavanje o zahtjevu fizičkog lica za izdavanje odobrenja za nabavku oružja)

- (1) Odobrenje za nabavku oružja izdaje se fizičkom licu koje ispunjava uvjete iz člana 9. ovog zakona.
- (2) O izdavanju odobrenja iz stava (1) ovog člana odlučuje nadležni organ rješenjem.

Član 16.

(Uvjeti za izdavanje odobrenje za nabavku oružja pravnom licu i fizičkom licu registriranom za obavljanje djelatnosti)

- (1) Odobrenje za nabavku oružja može se izdati pravnom licu i fizičkom licu registriranom za obavljanje djelatnosti, koje ispunjava sljedeće uvjete:
 - a) ako ima opravdani razlog za nabavku oružja;
 - b) ako odgovorno lice i lice zaduženo za bezbjednost ispunjava opće i posebne uvjete iz člana 9. ovog zakona, izuzev uvjeta iz člana 9. stava (3) tačke c) ovog zakona;
 - c) ako ima prostor za bezbjedan smještaj i čuvanje oružja.
- (2) Opravdan razlog za nabavku oružja ima pravno lice i fizičko lice registrirano kod nadležnog suda za obavljanje djelatnosti lova, uzgoja divljači, sportskog streljaštva, vođenje civilnih strelišta, obavljanje poslova fizičke zaštite, osposobljavanja lica za pravilnu upotrebu vatrenog oružja, naučnog istraživanja za koje je potrebno oružje, kao i pravno lice koje ima uspostavljenu unutrašnju službu za zaštitu ljudi i imovine u skladu sa važećim propisima.
- (3) Prostorni i tehnički uvjeti smještaja i čuvanja oružja i municije iz stava (1) tačka c) ovog člana utvrdiće se pravilnikom kojeg donosi ministar unutrašnjih poslova na prijedlog policijskog komesara.

- (4) Ispunjavanje uvjeta iz stava (3) ovog člana utvrđuje Komisija za utvrđivanje prostornih i tehničkih uvjeta smještaja oružja i municije koju imenuje ministar unutrašnjih poslova Unsko- saskog kantona.
- (5) Komisiju iz stava (4) ovog člana čine dva policijska službenika i jedan inspektor za zaštitu od požara i eksplozija.

Član 17.

(Rješavanje o zahtjevu pravnog lica)

- (1) Odobrenje za nabavku oružja izdaje se pravnom licu i fizičkom licu registriranom za obavljanje djelatnosti, koje ispunjava uvjete iz člana 16. ovog zakona.
- (2) O izdavanju odobrenja iz stava (1) ovog člana odlučuje nadležni organ rješenjem.

Član 18.

(Dozvoljeni broj oružja za posjedovanje)

- (1) Fizičko lice može imati najviše tri komada pištolja različitog kalibra, jedan revolver i pet komada lovačkog oružja za koje su mu izdate isprave o oružju, izuzev članova streljačkih organizacija.
- (2) Pravno lice i fizičko lice registrirano za obavljanje djelatnosti, osim agencije i unutrašnje službe za zaštitu lica i imovine, može posjedovati vatreno oružje čiji broj zavisi od potrebe i broja zaposlenih lica koja imaju potrebu za korištenje oružja.
- (3) Agencija i unutrašnja služba za zaštitu lica i imovine može posjedovati oružje čiji je broj propisan zakonom koji reguliše rad agencija i unutrašnjih službi za zaštitu lica i imovine.

Član 19.

(Žalba)

- (1) Protiv rješenja iz člana 15. i 17. ovog zakona, podnosilac zahtjeva može izjaviti žalbu Ministarstvu unutrašnjih poslova Unsko- saskog kantona u roku od 15 dana od dana prijema rješenja.
- (2) Rješenje doneseno po žalbi je konačno u upravnom postupku i protiv njega se ne može voditi upravni spor.

Član 20.

(Važenje odobrenja)

- (1) Odobrenje za nabavku oružja izdaje se sa rokom važenja od šest mjeseci od dana izdavanja.
- (2) Odobrenje za nabavku oružja koje nije iskorišteno u roku iz stava (1) ovog člana mora se vratiti nadležnom organu u roku od osam dana od dana isteka roka važenja.

Član 21.

(Registracija oružja i izdavanje oružnog lista i odobrenja za držanje oružja)

- (1) Fizičko lice koje je nabavilo oružje na osnovu odobrenja za nabavku oružja, dužno je nadležnom organu podnijeti zahtjev za registraciju oružja i izdavanje oružnog lista na propisanom obrascu u roku od osam dana od dana nabavke.